

DEO OPTIMO MAXIMO

UNI ET TRINO,

VIRGINI DEI-PARÆ, ET S. LUCÆ,

Orthodoxorum Medicorum Patrono.

DISSERTATIO MEDICO - CHIRURGICA ,

*QUOD LIBETARIIS DISPUTATIONIBUS
manè discutienda in Scholis Medicorum, die Jovis vigesima - nona
mensis Aprilis, anno Domini M. DCC. LXXIX.*

M^o. BERTRANDO DUPUY,
Doctore Medico, Præside.

DE FONTICULORUM USU.

1. **N**ATURÆ morborum Medicatrices. Hoc est præcipuum Hippocratis oraculum, cujusve sensus latissimè patet. Nec solum etenim à Naturâ vinci morbos absque remediorum auxilio aut etiam invitis remediis dici potest : sed quidquid ista valent, à Naturâ proficiscitur. Quin etiam ipsa tum in internis, tum in externis morbis, quæ sibi magis conveniunt quasi indiguisse deprehenditur. Nec huic sententiæ propugnandæ exempla defunt : imò potius confertim prodeunt, & numero sibimetipsis viam faciunt minùs expeditam.

2. Fonticulos hujus esse census multiplex docuit experientia ; quippe non raros viderunt casus clynici, in quibus Natura humori infando exitum molita est, adeò ut per hancce viam eliminarentur morborum reliquiæ.

3. Officium est Medici tum vires Naturæ nimis urgenteis cohibere, tum etiam, si langueant, excitare. Quò se conferre debeat, eum docebit morborum discrepantia. Præcipua morborum divisio in acutos & chronicos. Quænam verò, in hisce ultimis per longum tempus excurrentibus, virium Naturæ solutarum causa assignanda sit eruere, res est non levis momenti.

4. Quò minor erit tonus organi cujuscumque quod materiei morbum efficientis sedes esse reperitur, eò morbus ipse erit diuturnior, incassumque vires Naturæ agere necesse erit. Sedes morborum duplex, vasa scilicet & cellularis textus. In acutis vasa præsertim materiem morbi continent & exagitant : Inde horum actioni totum corpus obversatur. In chronicis verò, saltem incipientibus, qui ut plurimum particulares reperiuntur, fit quidam infarctus telæ cellularis viscera malè affecta ambientis ; in hac deponitur materia morbifica nocens, quâ præfente sufflaminatur illius telæ actio per se jam debilis. Textus nempe cellularis quodam tono gaudet, cujus verò effectus insensibiles prorsus evaderent, nisi accederet tum per vasa, tum per musculos continua ac perpetua succussio.

A

A

5. Sed cum materies illa textum cellularem infarciens partium majori sensibilitate præditarum actionem inturbet aut etiam aliquoties extinguat: quid ageadum Medico superesse existimabimus, nisi illam expellere conetur, sive stimulum addendo partibus folidis ac vividis, cujus ope se ipsas exonerent, sive, ut ita dicam, per vias Telæ cellularis undequaque apertas ac invicem communicantes illius humoris suctionem fecerit.

6. Varia quibus constat corpus humanum viscera quasi in massâ Textus cellularis collocantur, adeo ut ab illo in totâ suâ substantiâ penetrentur, aut etiam pro parte ex illo componantur. Illud medium, ut ita dicam, cellulare undequaque pervium est, cellulisque constat invicem communicantibus. Quod quidem infinitis probatur experimentis: insufflatione videlicet, aut potius emphyemate, quorundam corporum huc forte illapsum miris aberrationibus, puris, aquæ, humorisve cujuslibet morbifici metastasisibus.

7. Sunt re-verâ Textus cellularis à Naturâ institutæ separationes, quarum ope in partem dextram & in sinistram divisum fuisse corpus apparet, atque etiam distinguuntur superiora loca corporis ab inferioribus. Præterea unumquodque viscus certam ac propriam quasi nactum est provinciam, quæ ejus fortunæ sequitur, hujusque vitæ ac motuum particeps efficitur. Sed non inde concludendum ducimus, quod intercludatur via ab unâ parte corporis in partem oppositam: siquidem mille doceant exempla quàm magnâ celeritate varia morborum materies in locum magis disitum feratur, quique huic migrationi minime aptus fieri posse videbatur.

8. Non minimam Chronicorum morborum partem in Textu cellulari sedem suam habere quam plurimis demonstratur. Quin-imò & his fere omnibus eandem contingere, evincere haud difficillimum foret. Apud omnes tenim constat Physiologos, quod ope vasorum per totum corpus sparsa nutritionis materies ab ultimis eorumdem extremitatibus in Telam cellularem diffundatur, certoque ordine ibi deponatur. Si verò hæc omnia inordinatè fiant, jam tunc imperfecta remanet nutritio, succique recens adducti, deficiente assimilatione, præternaturalem characterem suscipiunt. Mox aderit Telæ cellularis insarctus, ipsiusque tonus deficiet. Tum nervi per ipsam decurrentes, in eaque incusa viscera torpebunt. Nec mora: magis ac magis malum serpere, functiones vitari, humores pessumdari, qualitatesque nocivas induere non nisi longo temporis intervallo debiles. Succus ille effusus, nec jam ullius assimilationis capax, propria quoque vitia debet acquirere, & pro variis partibus modo Rheumatismi tormenta æmulari, modo podagricos dolores intentare; tubercula etiam in pulmonibus, scirrhusque in glandulis producere aptus evadit. Oscillationes vasorum quibus constant viscera languescent, sive debilitentur vasa, sive indurationem quandam contrahant. Inde perit quidquid omne à viribus Naturæ expectandum foret; neque spem aliquam salutis concipere est, nisi tandem ars succurrere discat.

9. Itaque solvenda sunt vincula quibus constringuntur vires æconomiae humanæ, ejusque mechanismus obruitur. Extrahe materiem morbi: en sanus evadet quem modò ægrum videris. Fonticulos igitur aperias. Tum irritatione insuetâ nova Textus cellularis exagitatio, novæque illius succussiones: tum materies impacta è suis carceribus educi: cumque certis æconomiae corporis humani legibus eò appellant fluida ubi major est irritatio, jam illos humores effluere videas, & quâ data porta ruere, Nisi forsan talè irritamentum adhi-

bueris, unde nascantur spasmi & contractio quæ humores potius in corporis profundum retundant. Sed neque non illa adhibeas remedia quæ possint eisdem incidere, diluere, fluxiliores reddere, quæque agunt internè impellendo, dum fonticulus vi propriâ attrahit, & quasi resistentiâ minuit.

10. Quanam sint verò cautiones quas in instituendo fonticulorum usu negligere non expediat, eruere haud difficillimum.

11. Jam ab omni parte & quoquoersus penetrabilem vidimus esse Textum cellularem. Neque attamen inde concludas omnia loca corporis æque apta fieri fonticulis aperiendis. Præponenda sunt illa quibus aderit hujus telæ musculis suppositæ pars profundior, neque reperiuntur vasa majora, nervi, tendines, quæ loca tandem sunt quasi oscula variarum Textus cellularis divisionum, & juxta celeberrimum DE BORDEU tanquam magnorum saccorum aperturæ haberi debent. Nempe, verbi gratiâ, totius pectoris Textus cellularis, juxta magnos vasorum ramos ad brachia processus quosdam cellulares ire facit: & re verâ multiplici constat experientiâ, quod in curandis pluribus hujusce cavitatis morbis chronicis magnâ polleant virtute fonticuli quos hûc loci applicari jubent Asclepiadæi, & vix expectandum levamen attulerint.

12. Quin & tantam videntur suctionem producere fonticuli ad brachia positi, ut melioris notæ Medicinam facientes illos pro totius corporis ægreditudinibus, quæ tale auxilium requirunt, usurpare non dubitaverint, & his mediantibus, pertinacia ventris inferioris, crurum, ac pedum mala curari observaverint. Et tam frequens observata fuit humorum via è pectoris regione in abdominis cavitatem & vice versa, integrâ remanente Telâ cellulari, ut illa inter hæc corporis partes separatio quam instituere aggreditur celeberrimus DE BORDEU, multis non sat bene firmata comprobataque videatur, neque etiam in praxi tam magni momenti esse debeat.

13. Hos fonticulos aperiri jubemus neque scalpello, neque ferro ignito, neque etiam his causticis quæ ex salino-metallicis præparationibus desumuntur. Tantummodo incidit scalpellum, & tum corpora, quæ apertum vulnus servandi causâ adhiberi solent, partes distrahunt, non sine continuo dolore, atque indefinenter imminenti plagæ insistenti coadunationis periculo. Ferrum ignitum ab omnibus ferè ægris rejicitur; displicet etiam Medicis hæc nempe ratione, quod illius vim non possint tam facili cum negotio regere atque compefcere. Idem sit judicium de causticis è metallorum penu desumptis.

14. Scalpello quoque abstinendum ducimus, quod illius ope non nisi angustum vulnus conciliari possit, neque ideo satis amplum detur spatium humoribus quos è corpore egredi mens est.

15. Itaque instituatur fonticulus in ipso Telæ cellularis sinu, supra musculos, (non immediate tamen) nec in horum intestitio tantum; sit locus plusve minusve patens, adeo ut non unum sed plura pisa fovere possit. Hunc verò ad efformandum, lapide caustico probè confecto utendum ducimus. Omnes autem sciunt Chemicæ, quod nihil aliud sit, nisi sal alkali fixum ope calcis aëre fixo orbatum, omniq. humiditate spoliatum, cum prius exsiccatum fufumque fuerit. Hujus lapidis moles adhibenda varia sit pro variis subiectis, & Telæ cellularis profunditate majori vel minori. Idem sit judicium de tempore perficiendæ Escharæ idoneo. Illud verò summam requirit diligentiam, ne lædantur scilicet

musculorum subjeetorum aponevroses. Inde etenim infinita mala sequerentur : febres, convulsiones, & alia hujuscemodi.

16. Sæpissime pisa sufficiunt levi alendæ suppurationi. Aliquandò tamen requiritur unguentum quodlibet è suppurativis dictis, cui etiam inspergi poterit certa quantitas pulveris Cantharidum.

17. Hac arte quosdam summâ macie confectos ac quasi *σκαρδνις* pristinæ fanitati restitutos fuisse ac etiam torositatem & obesitatem recuperasse contigit. Alii sputo sanguinis liberati sunt. Quos huc usque vexaverat Rheumaticus dolor, eosdem ille dimisit. Plurimi quoque è morbis cutaneis huic remedio cefferunt.

DOMINI DOCTORES DISCIPLINÆ MAGISTRI,

M. Guillelmus - Josephus DE L'EPINE, Antiquior Scholarum Magister, Antiquæ Facultatis Decanus, Academiæ Censor.
M. Ludovicus Joannes-Baptista COSNIER.
M. Josephus COTTON.

DOMINI DOCTORES DISPUTATURI.

M. Antonius-Chaumont SABA-
TIER, Regis Exercituum in
Insulâ Corsicâ Medicus.
M. Joannes Franciscus-Achilles
DE LALOUETTE.
M. Franciscus THIERY, Eques,
Regis è salubri Consilio, Regi
Medicorum Collegii Nancii
Socius honorarius, Regique
ejusdem civitatis Scientiarum
& humaniorum Litterarum
Academia, nec-
non Biverrensis.
M. Ludovicus DESBOIS DE
ROCHEFORT, Eques, Censor
Regius.
M. Joannes MAC-MAHON,
Antiquus Exercituum Regis
& Nosocomiorum Militarium
Medicus, Regiæ Scholæ Mi-
litaris Medicus ordinarius.
M. Anna-Claudius DORIGNY.

Proponerebat Parisiis PAULUS - AUGUSTINUS - OLIVARIUS MAHON DE
HOUSSAY, Carnutæus, necnon Saluberrimæ Facultatis Medicinæ
Parisiensis Baccalaureus, Dissertationis Auctor. A. R. S. H. 1779.
AB OCTAVA AD MERIDIEM.